

2 Kolin

Pâlaŋ Kolin dapmelaŋge ekŋengat zapat meluwaŋ sekŋen ewe kumindaye

Zapat meluwaŋ kapi Pâlaŋnegak kuye. Kan keyet Kolin dapmelaŋge ekŋengat tuŋguwinangatnaŋ an notnaŋaŋ Pâlmak atindândâ msâgât set notnaŋ aikti egat keŋaŋ walalatgalen zet notnaŋ kapigok zewien: Pâlaŋ Kawawaŋgalen zet timti zempalakŋaŋ bembe an gwalak dâsuki manzein enenogat egaŋ eweŋaŋ Zisasimak ku maŋge. Tuŋgupmanen piwandesetgatnan koti zet kileŋ tazemulaloŋ mezin. Zet notnaŋ ikŋaŋgat mulupmaŋ mamneset bemzemti keyet zetnaŋ omba penaŋ zapat meluwaŋ kapiyet kumindaye. Pâlaŋ dapmelaŋge ekŋenaŋ milawat notnaŋ akumbewien ke ondekbeme delaŋ zeme timti kokogat an zut ombemideme met indamukulem mindeme bukŋen ombanik akumbemtingut timti kot am Zuda msalen meuyet kambeŋ tapbien ekŋen indamukulem mimiyet zemgwatnaŋ zet notnaŋ diindoye. Egaŋ ekŋenmagen ewe gilik zemet indikdigat nâmti zapat meluwaŋ kapi kuye.

Zet ŋotekŋaŋ temaŋ kapigogaŋ 2 Kolin kapiyet keŋaŋ talip:

1:1-11 Zet yaŋbemti zenzeyelen zet.

1:12–7:16 Pâlaŋ Kolin dapmelaŋge ekŋenmak zet weyeyaŋgalen notnaŋ zenzeŋaŋ.

8:1–9:15 Zuda amgat milawat om aku aku mulup mimiyelengat zemgwatnaŋ zet notnaŋ zeye.

10:1–13:10 Pâlaŋ ikŋaŋgat mulupmaŋgat yaŋaŋ bandim mti zet zenzeŋaŋ.

13:11-13 Zet zemdelaŋ zenzeyelen zet.

Zet yaŋbemzenzeyelen zet

1 ¹Neŋ Zisas Kilais ikŋaŋgalen ombemindendeŋaŋ mamayet Kawawaŋaŋ ikŋaŋ nâmdelaŋ zemti neme mamti mulupmaŋ kapi mamiyap. Âpme neŋmak Timoti nâmkŋipepen notn ekmak nit Kawawaŋgalen am maŋge nâmkŋipepenmak Akaia msalen mka kataŋ tapmelip ingat temakwep

papia pigok kumti bemalu mkañin ñotakñan Kolin ke kozin. ²Kawawañ Bipm ma Amobotnañ Zisas Kilais egañ keñ taolet mimindeme ingat tunjuwinan keñ sewakñañ wemti weweyet nâmti dunduyap.

Pâlañ Kawawañgat zemesewatpeye

³Amobotnañ Zisas Kilais egat Bipmañ Kawawañ ek bakkak toñañ ma ninmagen mukulem ekmageset etañ makopmâzin keyet mti nin ek sesewatpewanup. ⁴Egañ Zisasiyet buñam zapatnañañ kaliñañ tatagat nâmti mulupmañ mmann am ekñañañ nukñañ sambe dukñañ beme keyet palen tapmann Kawawañañ ikñañ ndamukulem dolakñañ mamin. Âpme nin naman mama mimi sepem keyegak timtati am notnne notnañ nukñañ sambe sokbemindame maolalip ekñañ keboñ ke indamukulem mimindewanup. ⁵Kilais egañ ikñañ sek sindem omba penañ nâmeti gakiye. Keyet katañ nin Kawawañgalen kwizet buñamañgapmti sek sindem kegogak omba penañ matinup. Keyepmti Kilaisiyañ Emetak Teñañ peme toti egañ ndamukulem mti keñ m eleñ beleñ bemndein. ⁶Ninmagen sek sindem sambe masokbemndain ke belak etañ penañ yek. In indamukulem mmann in yomengatnan gilik zemkwati mama kanzizit timti mamayet maminup. In nin sindem matinup sepem kegogak matip. Âpme Kawawañañ nin nukñañen ndamukulem mndeme mambanup beme nin keeset in nukñañen ñep indamukulem mimindemti zemgwatnañ mimindemann mambep. ⁷Âpme nin ingat nâmtemtem temañ mimipiñ pigok manâmkatikbenup. In ninmak tusumti mamaip keyepmti sindem indame keyet kinañgapiñ timti titiyak mamelip keyepmti Kawawañañ nin nukñañen manndamukulem min sepem kegogak in maindamukulem min.

⁸Nin Esia msalen mulup mmamti sek sindem palen etañ mamkwabenn. Keyet zapatnañ bugan pigok zemâtâtindama nâit. Kwitnañ kwitnañ nukñañ omba penañ sekñañ moti mtotndeme ekti nin ilak kapi gakisâpmnup elak penañ nâmkatik bewenn. ⁹Sepem kegok mti windenn penañ kwalepme delañ zemâge. Yañgut kwitnañ kwitnañ ke belak etañ penañ ku sokbemndaye. E nin nnañgat nâmann tototnañ beme Kawawañ ek am gakikiengatnan mamme walip egat kwewetañ nâmkinañpepeyet nukñañ sambe ke sokbemndaye. ¹⁰Nin nukñañ temañ ke timti gakikiyelen bududuk tapmnepemann Kawawañañ ikñañ ndañgalañ ndemti ndatimti koge. Nan alak nukñañen tapmann pi ewe tañgalañ ndemkwazin. Yañ bam ewe tatndañgalañ mepmambe e penañ nâmkatik beyap. ¹¹Keyet mti in dundunduyañ ndamukulem minndewep. Âpme Kawawañañ dundundujin nâmti ndañgalañ ndeme ewe mamann in ma am sambeyañ ningat mti Kawawañgat olim sesewatsawep.

Pâlañ Kolin mkaengatnañ am ekñañ ñen ku tetim indeye

¹²Nin yañañ kapigogapmti nnañgat bugan nâmann dolakñañ mambein. Nin Kawawañañ ndadamuj mme egat zikatnan zet penañ penañak

zemti kweteteþmaŋ mamti am nâmkijpepeþij ekŋen indamukulem mamimtemenn. Âþme naman ingat tuŋguwinan kopmamti indamukulem omba penaŋ mamimtemenn. Ewan am nnaŋgalen nânâen yek. Ke Kawawaŋaŋ keŋ taolet minndamti nânâ ndame egalen nânâen mulup mamimtemenn. ¹³Nin in zet maiŋti nânâyelen ilak kapi kumti bemann kozin. Ke maiŋti yaŋaŋ weyaŋ nâmâtâþme delaŋ zemâbe ke nâmkijpemindenup. ¹⁴In ningat yaŋŋ omba penaŋ ku nâmtalip; isikŋaŋ bugan nâmtalip yaŋgut yaŋŋ belatnik mamoti nâsâip. Mme temaŋ penaŋ Amobotnaŋ Zisasiyaŋ kobeen kan keyet nin dopmaŋaŋ dopmaŋgat yaŋŋ eknâm mbanup keyet oloŋen temaŋ penaŋ mbanup.

¹⁵⁻¹⁶Neŋ zet kapi keŋŋnan penaŋ tageyepmti neŋ weyeyaŋ mti ŋeŋaŋ in kot indikti nâmkijpepeþijŋ gwatnaŋ mimindemti eyetnan Masedonia msalen met maneti gilik zemti ewe inmagenak koti ewe sepem kegogak mimindema in naman napmukulem mimneme Zudia msalen mebegat nâmti zewan. ¹⁷Âþme in nâme neŋ zet ke belak etaŋ tetim indewanok bein? Ma in nâme neŋ am dâsukitoŋ ekŋenaŋ kwilekiŋen mimiyet zet zemkatik bemtingut naman ŋen mimipiŋ belak mapeme wennok sepem kegoak mamiyaŋ bein? ¹⁸Yek. Kawawaŋ ek an zet teŋ toŋ egat zikatnaŋ zet zewenn kelak penaŋ etaŋ. Dâsuki ŋen ku tazin. ¹⁹Kogogapm Kawawaŋgat Nemaŋaŋ Zisas Kilaisiyet buŋam zapatnaŋ neŋmak Sailas, Timotimak nin tim koti diindowenn ke zemusulalatnaŋmak ku tazin. Zetlak ikŋaŋ kwep ke etaŋ diindowenn kemak. ²⁰Kawawaŋgalen zetik sambe sopmaŋ zigok mkwakwatnaŋ ekŋen keyet penaŋin Zisasmagen sokbemâþme delaŋ zenzeŋaŋ. Kogogapmti nin egalen zetikŋaŋgalen penaŋaŋ ke nâmkijpemti Zisas Kilaisiyet wisikŋ zenup mti Kawawaŋgat kwizet buŋamaŋ kegozet mwatpenup. ²¹Kegok ke Kawawaŋaŋ ikŋaŋ in ma nin Kilaisiyet bembeyet zemgwatnaŋ mamminndein. Mti Kawawaŋ ikŋaŋgat zapat mamayet maombemndein. ²²Kawawaŋaŋ nin ikŋaŋgat betziŋaŋ bembeyelen nâmti Emetak Teŋ keŋnan bempye keyaŋ ekmagen kwitnaŋ kwitnaŋ bam tiwanup keyet busilinan bugan kogok mndaye. ²³Kawawaŋaŋ neŋmak tapme zet kapi zeap. Neŋ Kolin dâþmelange inmagen ku gilik zemkobanen e yaŋaŋ kapigogat neŋ inmak ku atindândâyelen nâmbangapm ku koban. ²⁴Neŋ inmak ku atindândâyelen nâmbanen ke kapigogat neŋ ingat mobotnaŋin bem tati nâmkijpepeen ke mit ke mit ku mimindandayelen nâmban. Nin inmagen mulup mbenen ke in nâmkijpepeen katikŋaŋ bemti oloŋen nsakwep mamayelen nâmti mbenn.

2 ¹Neŋ inmagen ewe koti kemberŋ temaŋ aik indawapmagengapm nâmtemtem miyapgapmti ŋep ku kobap. ²Neŋ am nâgât keŋŋ mme oloŋen bembeyelen elak in kwep ke keyepmti neŋ mneti keŋin mma bekaŋaŋ bewe beme naman am kwiyaŋ nâgât keŋŋ mme oloŋen bewe. ³Mneti in ilinak nukŋaŋin weyayaŋpiŋ tatnepeme neŋ kot indikti nukŋaŋ

tiwapmagen zemti papia űeűaű baen kumti indawan. Am neű keűű mme oloűen bembeyelen am maűűe elak in kwep penae ke. Keyepmti in nukűaűin sambe weyaűme delaű zeme tapme neű kot indikti oloűen mma in ilin kegogak oloűen mbep elak penae nâmindeyap. ⁴Neű ingat yayaű temaű mti keűű sindem beme simak simak tati nâmisimti zapat meluwaű ke kumti indawan. Wa neű zapat meluwaű ke in nukűaű aikindandayet nâmti ku kuwan. Neű keűű temaű inmagen penae matazin keyet yaűaű e in ekmâtâtâgat nâmti ke kumindawan.

Am űenaű kwileki űen myuűgumindame in yomin katikpewep

⁵Ingat tunűuwinaűgatnaű an űenaű keűűin mme walebe beme wa ke nâgât keűű eyo mme ku walebe ilinaűgat keűűin ke waletindawe. Neű zet winaűaűbeű an yom mge iűűaűgat eűemteű ombemzema űep ku besem. ⁶In sambenik penaűaű an kwitnaű kwitnaű műasik mimindaye keyet dopmaű msamkwabien elak űepgat peme tabe. ⁷Mneti egaű igak tapme nukűaű sambe keyaű omba penae mtopewemagat in yomaű ke katikpemtî zebabak mpemtî kandaűinan pemtî mambep. ⁸In notn notn penae ewe mpemtî gogot penae mti mimiek mimiyelen nâmzeap. ⁹Neű meluwaű keboűgat zet eweűan tipman baen zet diindowan ke maűűawepup ma yek? Keyet yaűaűin eknâsâgât nâmti papia űeűaű ke kumti indawan. ¹⁰In noline ekűenaű myuűgum indame in yomin ke katikpewep beme neű kegogak ekűengalen myuűűuűuűin katikpewep. An űenaű in myuűgumindawe beme neű ingat tikűaű omba matazin keyepmti Kilaisiyet monzalaman an keyet yomaű ke katikpewep. ¹¹Nin Sadaűgalen tetimaemae eyet yaűaűaű nâmpenup keyepmti nin egaű zetrelakűaű mindandayet kawaűaű bugan ku pewanup.

Pâlaű Toloas meti eyetnan Masedonia mege

¹²Neű meti Toloas mkaen patae zema Amobotnaű Kilaisiyaű iűűaű zet zapatnaű dolakűaű kapi ammagen zenzeyet setnaű dolakűaű penaű aikname tati ¹³naman notn Taitas ek ku aikban. Keyet mti egat yayaű temaű mti mulup dolakűaű ku mban. Keyepmti neű Toloas mka pemtî naman ek aiksât Masedonia msalen meban.

Nin Kilaismak tapmann nukűaűaű omba ku mtotndeye

¹⁴Nin Kilaisiyaű kan kataű ndabandim minndeme nin egalen mulup mmepmann nukűaű sambe masokbemndain kataű mtopemtî keyet oloűen mti ambeliliűaű makunup. Amnaű kasaűin mtoindemti oloűen mti ambelili makuip sepem keboűak nin Amobotnaűaű ndabandim minndeme msat kataű Kilaisiyelen buűam zapat zemepmann am ekűenaű keyet nâme soűgompelep sesik dolakűaű keboű mambein. Keyepmti nin Kawawaűgalen winde keyet wisikű manzenup. ¹⁵Wisikű manzenup keyaű

Kawawaŋaŋ nin ndikme zit kunuk sesik Kilaisiyaŋ Kawawaŋ mpeyenok mambenn. Âpme sesik keyaŋ kalaŋti mama kanzizitgat zapat bewep ma gakikiyet zapat bewep ekŋenmagen mekobe. ¹⁶Âpme am yomengatnan ku gilik zenzeŋaŋ ekŋenmagen nin Kawawaŋgalen zet dolakŋaŋ zemann nâmti waleletgat zapat mambeip. Ma am yomengatnan indatitiŋaŋ ekŋenaŋ nâme sesik dolakŋaŋ beme mama kanzizitgat zapat mambein. Keyepmti mulup dolakŋaŋ kabon kapi Kawawaŋaŋ ndamukulem ku mme nin nnak etaŋ mulup temaŋ kapi ŋep ku mbenek. ¹⁷Wa nin am Kawawaŋgalen zeleset kwizet buŋam temaŋ etaŋ matip ekŋen kebon yek. Nin Kawawaŋgat zetnaŋ kandaŋan mamamup keyepmti Kilaisiyaŋ nin ikŋaŋgat mulupmaŋ kapi mimiyet zemndeyepmti Kawawaŋgat zikatnan esemteŋ mamti mulupmaŋ mamnup.

Tâtâ alakŋaŋgalen mulup an

3 ¹In nâme nin nnaŋgat kwizet buŋam etaŋ mobotgat mulupmaŋ mamnup bein? Ma in nâme an ŋenaŋ ningat yaŋŋ papia notnaŋ ningat kwizet buŋam mmobogat kumti kot indawien? Ma in papia notnaŋ kebon kumti ningat kwizet buŋamm mmot ndendeyet manzenup ma? E yek penaŋ. ²Ningalen papia elak in kemak. Ingat mama mimiŋin dolakŋaŋ ma nâmkŋepepeŋin an imbi sambeyaŋ ke ekti nin inmagen mulup dolakŋaŋ mbenn ke ilinak maekmâtâlîp. ³Nin inmagen mulup mmann in Kilaisiyelen papia kebon bewien. Zet zeyap keyet yaŋaŋ sosok penaŋ tazin. Yaŋgut ke tinde sopmanen olekti meluwaŋ makunup sepem kebon yek. E ikŋaŋgat Kawawaŋ mama mamain egalen Emetak Teŋ keyaŋ am keŋinan baen meluwaŋ mpeye wa ke nanaŋ palakŋaŋ palen yek.

⁴Zet ke yaŋaŋ kapigogapmti zeyap Kawawaŋ nâmkŋepepeyelen set ke Kilaisimagesetgatnaŋgut sokbeye. ⁵Penaŋ nin nnak etaŋ mulup kwitnaŋ kwitnaŋ sambe kapi mmann ku sokbenak Kawawaŋaŋ etaŋ ndamukulem mme mulup sambe mmann penaŋ sokbem mâge. ⁶Kawawaŋ ikŋaŋ nin tâtâ alakŋaŋgalen mulup mimiyet ndaombem ndeme nin Emetak Teŋaŋ zemâtâtndame keyet kataŋ mulup ke mamnup. Wa nin zii zelen meluwaŋ mimiŋaŋ keyelen mulupmaŋ ku maminup. Âpme zii zet sambe keyaŋ nin ŋep penaŋ ku gawepumann delaŋ zenzeyelen keyepmti zii zet meluwaŋ mimiŋaŋ keyaŋ am gakiki katikŋaŋ maaikindain. Âpme tâtâ alakŋaŋ ke Emetak Teŋaŋ mulup mme keyaŋ mama kanzizit maaikindain.

⁷Kawawaŋaŋ zii zet ke nanaŋ palakŋaŋ palen meluwaŋ mge. Zii zet keyaŋ mulupmaŋ am ekŋenmagen mam ke gakiki aikindaye. Yaŋgut zii zet ke Kawawaŋ an busatnaŋaŋmak piyaŋ mme sokbeye. Keyepmti Kawawaŋaŋ Moses zii zet saye kan keyet Moses ŋenzimosetnan busatnaŋ temaŋ bemti tapme topme Israeal am ekŋenaŋ zigok epumti zimoseŋaŋ ekbiek belak kwalan kwalan mbien yaŋgut busatnaŋ ke Mosesiyet palen

tatat katikŋaŋ ku tage. ⁸Âpme Emetak Tenŋalen tâtâ alakŋaŋ keyet busatnaŋ zii zetgalen busatnaŋ silipein. ⁹Penaj sukwep Kawawaŋaŋ Moses zii zet saye kan keyet Mosesiyet zimosetnanen saŋga soŋgayaŋ uluŋ elaj tapmme toge. Zii zet ke dolakŋaŋ yaŋgut zii zet keyaŋ am belak zet muluwen etaŋ maindein. Âpme naman Kawawaŋaŋ am yomengatnan ndaŋgalaŋti tâtâ alakŋaŋ ke mobotnaŋ igagen penaj mme nin teŋ mamayelen winde keyet keŋan tazin. ¹⁰Mosesiyet ŋeŋzimosetnaŋ busatnaŋ tapme toge busatnaŋ keyaŋ belaknik tapmetneti yek beye sepem kegogak zii zetgalen mulupmaŋ dolakŋaŋ ewan belaknik tatopmâzin. Âpme tâtâ alakŋaŋgalen buŋam zapat kapiyaŋ naman itnaŋaŋ ewan sebempemti gwaen tapmozin. ¹¹Set eweŋaŋ sokbeye keyelen busatnaŋaŋ elak kan pigogak tototnaŋ beme naman tâtâ alakŋaŋ kapiyelen buŋam zapatnaŋaŋ omba penaj tapmakozin.

¹²Nin ŋoktikŋnan zet keyaŋ penaj tazin keyepmti nin mulup Mosesiyaŋ mge kegok ke ku maminup. Nin mulup tâtâ alakŋaŋ ke mâti kinŋagapiŋ mulup windenaŋbeŋ mamnup. ¹³Âpme nin Mosesiyaŋ mge sepem kegok ŋep ku mimiyele. Egaŋ busatnaŋ temaŋ ŋeŋzimosetnan tage ke Isael am ekŋenaŋ ekti walebiekmagengapmti egaŋ ŋeŋzimosetnaŋ saŋgum aiaikŋaŋ keyaŋ ambulutpeme tapmeti busatnaŋ ke yek bemeti yek beme delaŋ zeye. ¹⁴Mosesiyaŋ mge sepem kegogak Isael amŋane ekŋenaŋ keŋ otnânâŋin saŋgumaŋ atampemâbien. Keyepmti ekŋenaŋ Kawawaŋgalen Zet Itnaŋaŋ e ŋep mamaŋiŋ nâip yaŋgut keyet yaŋaŋ penaj ŋep ku maweyaŋnâmâtâlîp. Saŋgum ke gaipeme mebegalen. Setnaŋ ke Kilais kwewetaŋ nâmkinŋpemtingut ŋep gaipeme mebegalen. ¹⁵Yaŋ alak kan pigogat eyo ekŋenaŋ nin Mosesiyelen zet kapi gawepumti set keeset mama kanzizit mambanup. Zemti ke mâti mame keyaŋ saŋgumnok keŋ otnânâŋin maambulut tazin. ¹⁶Keyepmti am ekŋen keyaŋ ilin keŋin gilik zemti Amobotnaŋmagen mepme saŋgum ke tim beme mekobe. ¹⁷Amobotnaŋ ek Emetak Tenŋak keyepmti egaŋ am ŋengat keŋan matazin beme egaŋ saŋgum ke tim beme mekopme an keyaŋ belak lala mamain. ¹⁸Am nâmkinŋpepemak ningulak zimosetnnan busatnaŋ ke saŋgumaŋ ku mautukekpenup. Nin gapiyamnok tapmann Amobotnaŋgalen saŋga soŋga keyaŋ ningat palen ome nin naman sepem asekme Amobotnaŋgalen mama mimi ke omba penaj mkwapmann am ekŋenaŋ nin Amobotnaŋgalen maŋge e sosok manndikmâtâlîp.

Nin am indamukulem mmann busatnanen kwabep

4 ¹Kawawaŋaŋ aŋgalaŋ gogotnaŋgapmti nin mulupmaŋ kapi mimiyet ndaye. Keyepmti nin mulupmaŋ kapi ku katikpewanup. ²Âpme nin zet manzemkawaŋbenup kapi Kawawaŋ ikŋaŋgalen zet penaj. Keyet mti amnaŋ nin ndikti am ekŋen kapi Kawawaŋ ikŋaŋgat monzalaman mulup mamip elak manâmâtâtndeip. Nin zet dâsuki ma amnaŋ yom notnaŋ

enzilimti mammelip ma tetimaemae eborj eborj bamkumpemâbenn. Nin Kawawaŋgalen zet penaŋ peman tapme naman dâsuki kilerj ŋen ku manzenup. ³Nin Kawawaŋgalen Zet Zapat Dolakŋaŋ Penaŋ kapi diindomann am waleletgat zapat mamaip ekŋenaŋ ku manâmâtâlîp ekŋen ke walepmâbep. ⁴Msat kapiyelen Amobotnaŋ Sadarj egaŋ am ekŋen kapi tambusosok keŋan maintatimti main keyepmti ekŋenaŋ nâmkinjpepe ku maaigip. Egaŋ Kawawaŋgalen Zet Zapat Dolakŋaŋ Penaŋ kapiyaŋ keŋin mkawaŋ bem indeme Kilais ek Kawawaŋak ma am mama eyo maaikindain ke nâmâtâtî nâmkinjpepeyet selin mambekke indein. ⁵Nin toto kwati nnaŋgat kwizet buŋamm mobotgat ku manzemmetnup. Nin Zisasiyet kwizet buŋamaŋ etaŋ mwati Zisas Kilais ek ningalen Amobotnaŋ kekok manzenup. Mti nin ingat sisiliŋ anŋin mamanup elak sosok penaŋ mandiindonup. ⁶Kawawaŋaŋ msat kululuŋ mme sokbeye kan keyet pigok zeye, “Busatnaŋaŋ tambusosogen melak.” Zeme kekok mge. Sepem kekokak zeme am ningat keŋŋnan busatnaŋaŋ sokbeye. Keyet yaŋaŋ kapigok: Kawawaŋaŋ ikŋaŋgat windenaŋ keyet yaŋaŋ Kilaisimageseti am nin yomengatnan gilik zemti ndatiye keeset mkawaŋ beme ekmâtâbenn.

⁷Mti egaŋ ningat sekŋ windenepiŋ menzim tosiŋ bakŋaŋ keborj kapiyet keŋan Kawawaŋgalen Zet Zapat Dolakŋaŋ Penaŋ tapme timti manzemkawaŋbemetnup. Ke wan nin keŋŋnaŋgatnaŋ timti ku manzenup. Nin Kawawaŋgalen windeen etaŋ tati manzenup. ⁸Zisasiyelen buŋam zapatgapmti kan sambe penaŋ amnaŋ nukŋaŋ omba penaŋ manndaip yaŋgut ku mawaletnup nukŋaŋ temanen tati pe zigok minndame eksenuwenn zemti keŋ jut maminup. Yaŋgut kilerj ke nâmisimti mulup temaminup. ⁹Am sambeyaŋ ningat kasa ŋenzinziŋ omba mam ndaip. Yaŋgut nin Kawawaŋaŋ ikŋaŋ ndamukulem minndeme matatnup. Kan notnaŋgat kasa ekŋenaŋ omba penaŋ manndoip yaŋgut penaŋ ndome ku maŋgakinup. ¹⁰Msat sekŋ kapi kan sambe penaŋ gakikyelen selen mamezin Zisas msamebien sepem kekokak mamimndaip. Âpme am ekŋenaŋ Zisas kume gakiyeyaŋ naman wageyaŋ ewe mamain. Egaŋ ndaŋgalaŋme nin ewe alik kapi mamann am sambe ekŋenaŋ Kilais ek mama keyet toŋaŋ elak sosok maekmâtâpeip. ¹¹Nin pi Zisasiyet zet zapatnaŋ zekawaŋ bemann keyet kasa mti ndom walet mme gakikyelen bududuk penaŋ maminup. Yaŋgut Kilaisiyaŋ msat sekŋ kapi ewe mukulem mme alik mamann am ekŋenaŋ Kilais ikŋaŋ alik main elak sosok masokbemkawaŋ beme egip. ¹²Nin inmagen Kawawaŋgalen Zet Zapat Dolakŋaŋ Penaŋ diindomann keyepmti ndomkume gakisâgât penaŋ mimkwabenn sindem mulup kekok mkwabenngapmti in mama kanzizitgat zapat bewien.

¹³Kawawaŋgalen Zet Itnaŋaŋ Sam keyet keŋan zet ŋen kapigok tazin, “Neŋ nâmkinjpepenn tazin keyet mti neŋ Kawawaŋgalen zet manzemkawaŋ beyap.”

(Sam 116:10)

Sepem kegogak nin pigok zenup, Nin nâmkijpepenn tazin keyepmti Kawawaŋgalen zet pi manzemkawaŋ benup. ¹⁴Mulup ke mmambe pigok penaŋ manânuŋ Kawawaŋaŋ Amobotnaŋ Zisas gakikiengatnan mme wage. Âpme nin ekmak tusumti mamanup keyepmti Kawawaŋ egaŋ ninmak inmak kegogak mme wapmann ndatimti mot Zisasiyet kandaŋaŋ yaloŋndewe. ¹⁵Nin ingat mti sek sindem mulup mkwapmann Kawawaŋaŋ keŋ taoletnaŋgapmti am indij ŋen indij ŋen keŋin m eleŋ beleŋ beme Kilais nâmkijpemti Kawawaŋgat dundundujinanen wisikŋ zemti kwizet buŋamaŋ mamwapmâlip.

¹⁶Nin yaŋaŋ kapigogapmti nin mulup kapi mimiyet keŋeŋ eleŋ beleŋ beme maminup. Nin sekŋnaŋ belaknik belaknik piyaŋ mamenzeum tozin yaŋgut keŋeset Kawawaŋaŋ mene mene ndamukulem mti gwatnaŋ maminndein. ¹⁷Alak kan pigogat mulupgapmti nukŋaŋ ma sek sindem tatim kwatnup kapi kan isikŋaŋ bugan tapmoti delaŋ zewe. Âpme nukŋaŋ kapi matinup keyet penaŋaŋ Kawawaŋaŋ mama kanzizit ndame keyet keŋan moti egat zimosetnan teleŋgat mambanup keyaŋ mobotnaŋ penaŋ bein. ¹⁸Keyepmti nin keŋ otnânân nukŋaŋ tasokbemndame eknuŋ keeset ku bemann tabe. Nin bam kululuŋen gwaen moti oloŋen palen kwesiŋ mambanup keeset bemann tabe. Alak kwitnaŋ kwitnaŋ sambe tasokbemndain kapi kwesiŋ ku tapmobe. Bam mama oloŋen palen mamobanup keyaŋ kwesiŋ tapmobe.

5 ¹Keyepmti nin pigok nânuŋ: Nin msatgalen mka minzalaŋnok kapi Kawawaŋaŋ asekpeme toweme naman mka alakŋaŋ ŋen kululuŋengatnaŋ ke ndame ke timti mama kanzizit mamti mambanup. Mka minzalaŋ ke wa am belañ mawalatnup keboŋ yek minzalaŋ kapi sekŋ kapiyet nâmti zenzeŋaŋ. ²Nin mama mamanuwen kapi nukŋaŋ sambeyaŋ sokbemndame keyepmti msat sekŋ kapi gaipemann toweme kululuŋen gwaen moti sekŋ penaŋ ke timti sek welelaŋŋ kwawepme mamayet nâmti eyak temaŋ maminup. ³Nin kululuŋen gwaen sekŋ alakŋaŋ tazin yaŋ maneti gakimti mot bam tiwanup e nâmann tapme mamanup. ⁴Alak sekŋ tazin kapi nukŋaŋaŋ kwati mamimtopein yaŋgut nin gakikiyet ku manânuŋ. Nin belak sekŋ alakŋaŋ kemak sekŋ itnaŋaŋ kapimak timunduŋti sekŋ alakŋaŋ keyaŋ minzilime delaŋ zeme melesiŋ kululuŋen mobogat manânuŋ. ⁵Kwitnaŋ kwitnaŋ tasokbemndain kapi sokbemndandayet nâmti Kawawaŋaŋ eweŋanak nâmatâpme weme keyet piliŋaŋ Emetak Teŋaŋ ke yaŋbemti ndaye.

⁶Nin kwitnaŋ kwitnaŋ kegok sokbemndawe e nâmti keyepmti nâmann eleŋ beleŋ beme mamanup. Nin msalen pien msat sekmak mamnuŋ yaŋ maneti gakiwanup beme Amobotnaŋmak moti mambanup. Nin msalen pien msat sekmak mamanupgapmti nin Amobotnaŋŋ egalen mkaen ku matatnup. ⁷Keyepmti kan pigogat nin Amobotnaŋ zikalaŋ eekpiŋ belak etaŋ nâmkijpemti mamayelen kan tazin. ⁸Nin Amobotnaŋmak moti

mambanup e penaj nânupgapmti keyaj keŋj m elej belej bem ndeme gakikiyet mee eyet ku makingatnup belak nâmann ŋep etaŋ mambein. ⁹Nin sekj kapi melesij msalen kapi mambanup ma kululuŋen moti sekj alakŋaj timti mambanup beme kwitnaŋ kwitnaŋ notnaŋ sambeyet nâmann tototnaŋ beme Amobotnaŋj ek etaŋ keŋnan mmann pembenaj mamti mambe. ¹⁰Maneti am nin sambe bepi Kilaisiyaŋ zet zemdelaj zenze munduman tapme egat kandaŋan mopmann delaŋ zemâbe. Âpme egaŋ nin msalen pien mamti mama mimi dolakŋaj mbenn ma bekaŋan mbenn keyet tosaŋaj ikŋaŋgat toŋaj toŋaj kalaŋ kumti ndamâbe.

**Pâlaŋ Zisasiyaŋ yomengatnan ndatiye keyet
buŋam zapatnaŋ zemkawaŋ beye**

¹¹Set kekok penaj tazingapmti nin Amobotnaŋgat nâmpemann mamozin. Keyepmti nin am indamukulem mmann nâmkijpepe aikgat mulupmaŋ kaliŋaj maminup ke Kawawaŋaj ikŋaj penaj nâmnndein sepem kekokak in ningat nâmnndeip e nâmtalap. ¹²Wa in nin kwizet buŋamm in mmot ndendeyet nâmti nnaŋgat keŋnaŋgalak zet dolak dolakŋaj ku mandiindonup. Nin Amobotnaŋgalen mulup esemteŋ penaj ke mmanngut am notnaŋaj msatgalen mama mimi keeset mti sekjin etaŋ mammolip ekŋen keyaj ningat naman kasa maminndaip keyepmti in am ekŋen keyaj zet ŋen wakjinan peme topme in dopmaŋ naman Amobotnaŋgalen zet ke timtati diindowep. ¹³In ningat nâme keŋin kilom mambein kekok manâip beme e nin Kawawaŋgat kwizapatnaŋ mwawatgat sepem kekok mamnup ma nin ŋoktikj esemteŋ nâmtâtati mulup mamnup beme e in pembenaj bembeyet nâmti ke maminup. ¹⁴Kilaisiyaŋ ningat gogot penaj maminndain keyepmti nin pigok nânup: An kwewetaŋaj am nin sambeyelen yomgapmti gakimti nin ndamukulem mme nin yomgalen mama mimi mgasigen mamkwabenn bee bankumpemann delaŋ zemâge. ¹⁵Egaŋ msalen am sambe nin bekapiyet mti gakimti naman gakikiengatnan gilik zemwati mama alakŋaj kapi aikndaye. Keyepmti nin mama ke mamti nnaŋgat sekj ŋep ku mmobogalen. Nin Kilaisiyelen mulupmaŋ ke windaŋaŋbeŋ mti ek etaŋ manzemesesewatpemambanup.

¹⁶Alak nin nnaŋgalen nânâ mâti am ŋeniyet ewe zelin ku manzemdelaj zemindemambanup. Eweŋan nin am nnaŋgalen nânâ ke mâti keyet kataŋ Kilaisiyet zetnaŋ zemdelaj zempewenn. Yaŋ nin set sepem kekok ke ewe ŋen ku maminup. ¹⁷An ŋenaŋ Kilais ek penaj manâmkijpein beme egaŋ Kilaismagen mama alakŋaj ke timti naman an sepem igak ŋen ke makwazin. Egaŋ mamaŋaj mgasik itnaŋaj mamkwage ewan katikpem mâpme delaŋ zeme egaŋ naman Kilaisiyelen mama alakŋaj ke yaŋbemti mamezin. ¹⁸Nin itnaŋaj Kawawaŋgat kasa mti manepemann Kawawaŋaj Kilais egat mti egaŋ naman ndamimgilik

zeme nin egat notnane penaŋ sokbewenn. Âpme egaŋ nin am notnaŋ ekŋen eyo indamukulem mmann egat notnane sokbembeyet nâmti mulupmaŋ kapi ndaye. ¹⁹Nin Kawawaŋaŋ Kilais egat pembenangapmti msalen am sambe bepi notn notn etaŋ mamimndein keyet zapatnaŋ nin kapi zemkawaŋ bemndame nin am manzemkawaŋ bemindanup. Am egat notnane penaŋ bemti mamaip ekŋen ke egaŋ yominangat dopmaŋ indandayet nâmti yomin kumabiliwezin.

²⁰Kawawaŋaŋ ningat paleset in zet mandiidoin. Nin Kilaisiyet kwitnanen ingat pigok zemti indayaŋkwesinup. Ka yek, in Kawawaŋgat kasa mamip e peme tapme Kawawaŋaŋ iŋaŋgat notnane penaŋ bemti mamayet indatiwe. ²¹Kilais ek yomaŋ meepiŋ yangut Kawawaŋaŋ am ningat mti ningalen yomm bepiwan naman timtati Kilaisiyet dukŋan peme mowege. E nin ekmak tusumti Kawawaŋgalen mama teŋ ke nin eyo titiyet nâmti kegok mge.

Pâlaŋ Kawawaŋgalen mulupgat nukŋaŋ omba penaŋ tiye

6 ¹Nin Kawawaŋ iŋaŋmak mamti mulup maminuwaŋ in pigok indayaŋkwesinup: Ka yek, in Kawawaŋaŋ keŋ taoletnangapmti mulup dolakŋaŋ notnaŋ mimiyet winde indaye ke in belak peme ku tabe.

²Nâip, Kawawaŋgalen Zet Itnaŋanen zet ŋen pigok zenzeŋaŋ,

“Neŋ kan esemteŋ keyegak ingalen kwizelin nâmti yomengatnan gilik zemti indatiwan.” (Aizaya 49:8)

Nâip, kan kapi ilak am yomengatnan gilik zemti indatiti keyelen kan esemteŋ penaŋ ilak alak kapi sokbein.

³Nin am ŋenaŋ mulup maminup keyet keŋanen myuŋguŋgunn ŋen ku aiikgat nâmti maweyaŋ mnup. Mneti nin kwileki ŋen mmann yuŋgume am ekŋenaŋ ke ekti nâme ŋep ku beme Kawawaŋgalen Zet Zapat Dolakŋaŋ Penaŋ manzenup kapi bamkumpeme ŋep ku bewe zemti maeksenup. ⁴Nin Kawawaŋgalen mulup kapi esemteŋ timamti mmann am ekŋenaŋ Kawawaŋgalen mulup an penaŋ maip e ŋep ndik mâtâbep. Nin mulupmaŋ ke mti sewak palen mamann am ekŋenaŋ sisipeŋpeŋ temaŋ mimndame nukŋaŋ temaŋ keyet palen mot anzam tati olat olat palen mamti keyet nâmann kiŋgagatnaŋmak ku bewe. ⁵Am ekŋenaŋ kileŋ manndomkuip ma ndatamti met mka katikŋan manndeip. Ma am sambeyaŋ bililim kot ndatamti ndome gakikiyelen bududuk maminup. Nin kegok minndame nâmisimti Kawawaŋgalen Zet Zapat Dolakŋaŋ Penaŋ zenze mulup tagoŋgopiŋ mimiek mmeti muluk mee wewepiŋ ma tu meu mee dolakŋaŋ aikniniŋiŋ mamanup. ⁶Nin mama kweteteŋmaŋ penaŋ mamanup. Nin Kawawaŋgat yaŋaŋaŋ sambe penaŋ nânup ma sewak sewak palen mamanup ma am gogot dolakŋaŋ mimindamti manup. Ma Emetak Teŋaŋ gwatnaŋ mimndeme mamann am ekŋenaŋ nin Kawawaŋgalen mulup an penaŋ mamanup elak manâmnndeip. ⁷Nin

Kawawaŋgalen windemak tati zetnaŋ penaŋ kapi manzemkawaŋbenup ma mama mimin kwetetepmaŋ keyaŋ timbi sâkŋnok beme timtati nembelen sekŋ aŋgalaŋpenti nembetnaŋ naman kasanne indelem mâpmann mebeŋ. ⁸Keyepmti am notnaŋ ekŋenaŋ naman mamimtotndeip. Âpme notnaŋ ekŋenaŋ ningat nâme mopme manzemesesewatndeip. Nin zet penaŋ ke zemanngut notnaŋ ekŋenaŋ ningat nâmdeme an dâsukitoŋnok mambenup. ⁹Âpme am notnaŋ ekŋenaŋ ningat Kawawaŋgalen mulup an pembedaŋ yek kekok zemti nâmdeme tototnaŋ mambenup yaŋgut am notnaŋ sambe ekŋenaŋ naman ningat yaŋŋ ŋep nâmdeme mandelaŋ zein. Am notnaŋ ekŋenaŋ nin kwapem penaŋ ndome gakikiyelen bududuk penaŋ mamanup. Yaŋgut kileŋ penaŋ ke nâmisimti temamanup. Naman kan notnaŋat ndatimti mepme amobotnaŋ ekŋenaŋ zemdelaŋ zeme omba penaŋ mandom kwatamtemien. Yaŋgut penaŋ manndome ku maŋgakinup. ¹⁰Nukŋaŋ sambe penaŋ ke sokbemndame keŋŋ sindem omba penaŋ mambein. Yaŋgut nin Amobotnaŋat etaŋ nâmti oloŋen maminup. Nin mânep milawatnpiŋ am bekopsat penaŋ mamanup. Yaŋgut nin am indamukulem mmann ekŋenaŋ nâmkŋpepemak bembeyet mulupmaŋ windeŋambeŋ maminup. Nin penaŋ kwitnaŋ kwitnaŋ sambe ku tatndain yaŋgut Kilaisiyelen mama mimi sambe bee penaŋ tatndame delaŋ zein.

¹¹Kolin am maŋge notnne dolakŋaŋ penaŋ, nin ingat tikŋaŋŋ omba penaŋ matatndain elak sosok penaŋ zemkawaŋ bemindamann nâip ke. ¹²Nin pien mamti ingat otnâpeŋ penaŋ mamanup yaŋgut in ilinagak ningat wisat minndemti bamkumndewien. ¹³Keyepmti neŋ am notnaŋaŋ nemunambaŋine ekŋengat zet manzeip sepem kekokak neŋ ingat pigok penaŋ diindoma nâit. Nin ingat tikŋaŋ manâmindenup sepem kekokak in ningat tikŋaŋ ewe nâmdemti kot tusume nsakwep mambanup.

**Am nâmkŋpepepiŋ ekŋengalen mama mimi ku
mâti mamayet aŋkeŋoo zet zenzeŋaŋ**

¹⁴In am nâmkŋpepepiŋpiŋ ekŋenmak met lumaŋti ekŋenaŋ mama mimi bekaŋaŋ mamip sepem kekokak ku mbep. Am bekaŋaŋmak am dolakŋaŋaŋ zigoset notn notn mti mambuk ma busatnaŋmak tambusosogaŋ zigoset temakwep ondekti tabuk? ¹⁵Ma Kilaismak Sadaŋ ekŋenaŋ zigoset mulup ŋen mimiyet zenâmti keŋ kwep bewuk? Ma am nâmkŋpepeŋaŋmak am nâmkŋpepepiŋ ekŋenaŋ zigoset maŋge kwep penaŋ bemti mambiek? ¹⁶Ma nin zigoset Kawawaŋ penaŋgalen sesewat mka temaŋ kemak naman nopiom egalen sesewat mkamak tusumidewanup? Nâip, Kawawaŋ mama kanzizit mamain egalen sesewat mka ke am nâmkŋpepemak nin. Keyepmti Kawawaŋaŋ Zet Itnaŋanen pigok zeye,

“Neŋ aminne ingat tuŋguwinan mundum weyaŋti ke mamambap.

Mti neŋ Kawawaŋin bemti mama in nâlen aminne bemti
mambep.”

(Wok Pris 26:12; Zelemaia 32:38; Esekiel 37:27)

17 Keyepmti Amobotnaŋaŋ pigok zeye,

“In am neŋ ku manâmkijpem neip ekŋenmak tusummaneti ekŋengalen mama mimi bekaŋaŋ notnaŋ in ku mimiyelen zemkulumindendeŋaŋ ke mbepmegat wati kunzuŋti nenmagen pien kopme nen indatiwap.” *(Aizaya 52:11; Esekiel 20:34, 41)*

18 Âpme nen biwin mama in nemunambanne bemti mambep.

Amobotnaŋ ek kwitnaŋ kwitnaŋ sambeyelen winde bee tasamâpme delaŋ zein. Egaŋ ningat zet kekok penaŋ zein.”

(2 Samuel 7:14; 7:8; Aizaya 43:6; Hosea 1:10)

7 1 Notne dolakŋaŋ penaŋ, neŋ pigok zemkawaŋ bema nâit:

Kawawaŋaŋ zetik sambe mge bee nin kapiyet nâmti mge. Keyepmti nin yomaŋ keŋŋ sekŋ mme bekaŋaŋ bemberaŋ e zulutkaputmann delaŋ zeme kwetetepmaŋ penaŋ mamti Kawawaŋgat etaŋ nâmann mobotnaŋ beme egat kandaŋanak matapmambanup.

2 In ningat keŋjin ewe beme ninmagen ewe kopme mamambanup. Inmagengatnaŋ am notnaŋ ekŋenaŋ ningat ekŋenaŋ am belak keŋjin mamyuŋgum indeip ma am notnaŋ bekaŋaŋ mimiyet zet kelakŋaŋ mimindeme ke metneti mawalelip ma tetim indemti milawalin notnaŋ makakimtip manzeip. E ilin zet keyet yaŋaŋ nâmtalip. Wa neŋ zet kapi in mtot indendeyet nâmti zet kapi ku zeyap yek. 3 In ninmak notn notn dolakŋaŋ penaŋ mamanup keyepmti gakiwanup ma ewe alik mambanup beme tususun tazin ke ku etiwe keboŋ keyepmti neŋ meluwaŋ ŋeŋaŋ kuwan ke wa in mtot indendeyet zetnaŋ ku kumindawan. 4 In Kawawaŋgalen mulup dolak dolakŋaŋ sambe ke ewe mmebep. E nâmkijpem indeyap keyepmti neŋ ingat nâma dolakŋaŋ penaŋ beme masesewatindeyap in nâgât keŋŋ omba penaŋ gwatnaŋ mamimneip. Neŋ Zisasiyelen mulupgapm sek sindem omba penaŋ timkwaban yaŋgut in naman mme keŋŋ oloŋen penaŋ mambein.

5 Nin Masedonia msalen meti mulup yaŋgbemti mbennen kan keyet nin tagoŋgo dolakŋaŋ ŋen ku aikbenn penaŋ. Mka sambe mebenn kataŋ nukŋaŋ sokbemndaye ma am notnaŋmak zet mmot mtot omba mbenn ma ndomkusât mme sekŋnaŋ omba penaŋ makiŋgatan. 6 Keyaŋgut Kawawaŋ ek an zemkâkât toŋaŋ keyepmti egaŋ nin zemkâkât minndemti keŋŋ m eleŋ beleŋ bemndendeyet nâmti Taitas zempeme ningalen pien koge. 7 Wa egaŋ ninmagen koge keyet etaŋ nâmti ku zeyap. In ek gwatnaŋ zet dundumti naman neŋ eyo kot niknikgat keŋjin temaŋ matazin keyet ma in nâgât kemberŋ manâip ma nukŋanen tapma otnânâŋjinan bandim mamimneip. Keyet zapatnaŋ kot zeme nâmti neŋ ingat oloŋen temaŋ penaŋ mban.

8 Neŋ itnaŋaŋ meluwaŋ kumti indawan ke in maiŋ nâmti keyet nâme bekaŋaŋnik beye yaŋgut nenn zet kumti indawan keyet nâma bekaŋaŋ ku bein. Zetn keyaŋ in kan isikŋaŋ bugan bukapi keŋjin mme bekaŋaŋ

beye keyet nâma nukŋaŋnik beye. ⁹ Yangut alak kan pigogat neŋ ingat nâmti oloŋen palen penaŋ talap wa meluwaŋ kumti indama ekti nâme ŋep ku beye keyet yek. Nâmbekam bembe mbien keyelen yomaŋ keŋin mgilik zeye keyet nâma dolakŋaŋ bein. Zet ke Kawawaŋaŋ ikŋaŋ nâme weŋge keyet katnanen sokbemindaye. ¹⁰ Amgalen nukŋaŋ sepem keboŋ mataindain ke Kawawaŋaŋ mamaŋin mgasik ke mgilik zemti naman egaŋ mama kanzizitgalen set maaikindain. Keboŋ keyepmti nin nâmbekambembe temaŋ ŋen ku maaiknup. Am msalen sambe yomin bamkumpemti keŋin ku gilik zemti Kawawaŋmagen ku mamelip. Ekŋen sambe bee mama mimiŋin bekaŋaŋ keyaŋ indaâtâindeme teziŋ ŋandaŋ mebep. ¹¹ In nâip, in yom tuŋguwinan ke sokbeme nukŋaŋ palen mamkwabien ewan naman Kawawaŋaŋ mim gilik zeme inmagen mama mimi dolakŋaŋ sambe pigok sokbemindamâge. In yom sokbeye ke mtopepeyet nânâŋin kaliŋaŋ penaŋ matazin. Ma myuŋguŋgu notnaŋ tuŋguwinan sokbeme sakwep weyaŋti belaknok tapme amnaŋ myuŋguŋguŋin ku maegip. Ma myuŋguŋgu notnaŋ mimiŋet keŋin temaŋ ku matazin ma mineti Kawawaŋgalen ŋenzinziŋ ninmagen sokbesem zemti egat kiŋgapeŋ maip ma nin kot indikmann dolakŋaŋ bembeyet nâmti myuŋguŋguŋin sakwep weyaŋti matalip. Ma mineti myuŋguŋgu ewe kwesiŋ tapme ŋep ku besem zemti Kawawaŋgat zikatnaŋ sakwep maweyaŋip ma an myuŋguŋgu mge e keyegak sakwep myuŋguŋguŋaŋgat dopmaŋ mutumsawien keyepmti yaŋaŋin keyaŋ pigok penaŋ mamsokbemindein ingat tuŋguwinan myuŋguŋguŋin bugan ku tazin. ¹² Neŋ eweŋan meluwaŋ kumti indawan ewan an myuŋguŋgu mge egat etaŋ nâmti ku kumindawan ma an ŋen an kapiyaŋ myuŋgumsaye egat etaŋ nâmti kegogak ku kuwan yek. In Kawawaŋgat zikatnan ningat tikŋaŋin omba penaŋ matazin keyepmti ingat meluwaŋ kapi kumti indawan.

¹³ Yangut neŋ wan kwep keyet etaŋ nâmti keŋŋ dolakŋaŋ ku beye. Taitas inmagen kopme in zemtetimemopme mukulem dolakŋaŋ mpeme ekti egaŋ keŋaŋ pembeŋaŋ penaŋ beye keyaŋ eyo keŋŋ mme oloŋen beye. ¹⁴ Taitasiyaŋ inmagen koŋât mme neŋ in animbi dolakŋaŋ e eweŋanak dundumti ingat sekŋin mmoban. Yaŋ in manepeme egaŋ kopme neŋ zapat dunduwan keyet kataŋ msawien. Nin ingat zet ŋen nâmti manzenup ke zetnaŋ kipmaŋak mambein sepem kegogapmti nin Taitas inmagen kokogat zet zemti keŋaŋ mwat pewenn e penaŋak msawien. ¹⁵ Taitas egaŋ ke kopme in egat nâme mobotnaŋ beme oloŋti met peme egaŋ zet notnaŋ zeme zetnaŋ gawepuwien. Yaŋ alak egaŋ pien tati kwitnaŋ kwitnaŋ sambe msawien keyet otnâm meti ingat nâmindeme dolakŋaŋ penaŋ mambein. ¹⁶ Nin alak pigogat inmak tususunn ewe dolakŋaŋ sokbein keyepmti neŋ ingat oloŋen temaŋ penaŋ mimindayap. Mti ewe mama sepem kapigogak mamobanup e penaŋ nâmkiiŋpeyap.

Pâlaŋ tewalaŋ bembeyet zetnaŋ zemâtâge

8 ¹Kolin dapmelaŋge notnne, in Kawawaŋaŋ Masedonia msalen dapmelaŋge maip ekŋen keŋ taolet temaŋ mimindame ekŋenaŋ Kawawaŋgat tewalaŋ temaŋ bewien keyet yaŋaŋ in weyaŋ indikmâtâtâtgat nâmti pigok diindosowap. ²Masedonia dapmelaŋge ekŋen nukŋaŋ sambe sokbemindame keyet palen moti olat olat temaŋ mkwabien. Ekŋen am bekopsat penaŋ ke mambienanŋgut Kawawaŋgat tewalaŋ bembeyet keŋin oloŋen temaŋ penaŋ tage keyepmti tewalaŋ omba penaŋ bemkwabien. ³Ekŋenaŋ Kawawaŋgat tewalaŋin bembeyet eyakŋin omba penaŋ tage. Keyepmti ekŋenaŋ tewalaŋ omba penaŋ bewien elak penaŋ nâmindeyap. Wa nâlen zetgat yek ilinangat keŋinaŋgalak mmoti omba penaŋ bewien. ⁴Ekŋenaŋ nin nâmindemann Kawawaŋgalen dapmelaŋge Zudia msalen olat olat palen mambien ekŋen ke nin nâmindemann ekŋenaŋ eyo indamukulem mimndendeyet ndapitiliwien. ⁵Âpme nin ekŋenaŋ tewalaŋ gesiŋaŋ isiŋaŋ kekok bewep e nâmti tatnepemann naman ekŋenaŋ mmoti omba penaŋ mambeip. Ekŋenaŋ ilin melesiŋ Kawawaŋgat betnan beme maindikdamuŋ min yaŋ bam Amobotnaŋaŋ iŋkaŋ nâme weŋge keyet kataŋ ningat kekok gogot minndawien. ⁶Âpme in eyo Zudia am indamukulem mimiyet Taitasiyaŋ kot indamukulem mme yaŋbemti sek bandim notnaŋ indandayet akuku mulup mmetneti peme muluwinanŋ memuŋ bemti tage. Mulup dolakŋaŋ mkwabien ke ewe kot indamukulem mme mimiyet zempewan. ⁷Kolin am inmagen mama mimi dolakŋaŋ kapigok wein: In nâmkîŋpepeŋin kaliŋaŋ tazin inmagen Kawawaŋgalen Zet Zapat Dolakŋaŋ Penaŋ zenze an dolakŋaŋ sambe talip ma in Kawawaŋgalen zet ŋotekŋaŋ sambe penaŋ nâip ma in am indamukulem mimiyet webembenŋin temaŋ tazin ma in ningat tikŋaŋin omba penaŋ tazin kekok keyepmti in tewalaŋ bembeyet eyo otnânânŋin temaŋ penaŋ bemti mamayet nâmti diindoyap.

⁸Wa neŋ in ke sakwep mimiyet ku indapitiliap. Masedonia dapmelaŋge notnne bekakan ekŋenaŋ tewalaŋ bembeyet otnânânŋin temaŋ penaŋ matazin in muluwin ke mbep beme muluwin keyaŋ in Zudia am ekŋengat gogot mamimindeip ke ilak penaŋ mkawaŋ bemindawe. ⁹In nâip, Amobotnaŋ Zisas Kilais ek keŋ taoletnaŋ temaŋ penaŋ eknup. Ek kwitnaŋ kwitnaŋ sambe bekapiyet toŋaŋ yaŋgut egaŋ ningat mti kululuŋen mundumaŋ dolakŋaŋ e peme tapme toti am nin kabon bekopsat penaŋ bemti maŋge. Mti set kegoset egaŋ am nin yomengatnan gilik zemti ndatimti mama kanzizit motitiyet setnaŋ aikndaye.

¹⁰⁻¹¹Pi nâgât nânânŋan zet pigok tazin ke zemsokbemindama nâit: In nup kan tipman baenak yaŋbemti tewalaŋ mânep akum bembe mulup kapi mimiyet keŋin puŋpuŋ penaŋ kwapme mkwatneti naman tuŋgupman peme memuŋ bemti tage. In mânep akuku mulup ke alagak

yaŋbemti keŋin seŋme oloŋen palen mulup ke mkwabien. Sepem kegogak ewe mmepme amiŋine ekŋenaŋ mânep taindain kataŋ bemeti beme delaŋ zewe. ¹²In tewalaŋ mânep ke bembeyet keŋin puŋpuŋ mme keŋ taolet palen taindain kataŋ bewep. Âk penaŋ ku taindawe beme keyet yayaŋ temaŋ ku mbep. Kawawaŋaŋ am sambeyet nânâŋinaŋgat yaŋaŋ maekmâtâpme delaŋ zein.

¹³⁻¹⁴Wa nin in mânep akumti am bekopsat indamti ilin naman omtimat timat palen mamayet nâmti ku zenup. Alak kan pigogat in mânep polak polak penaŋ taindain keyepmti in am notnaŋ deset olat olat palen tapmelip ekŋen indamukulem mimindewep. Ya naman maneti ekŋenaŋ nimwiaŋ wiaŋ temaŋ palen tapme in naman kambeŋ sokbemindawe beme naman ekŋenaŋ in kegogak indapmukulem mimindewep.

¹⁵Kawawaŋgalen Zet Itnaŋanen zet ŋen pigok zenzeŋaŋ tazin,

“Israel am ekŋenaŋ msat tuŋgupan mameti meuŋin mana ke matim nimtemien. Am meti mana omba polak polak maambepeleti timkotemien ekŋen polak polagak ku taindaye ma am meti mana ilinaŋgat kataŋ isikŋaŋ bugan timti makotemien ekŋenaŋ olat olat temaŋ ku mbien.” (Kisim Bek 16:18)

¹⁶Neŋ ingat tuŋguwinan kot mamti mulup mimiyet keŋŋ temaŋ penaŋ matazin. Sepem kegogak Kawawaŋaŋ Taitas keŋaŋ m eleŋ beleŋ beme egaŋ ingat tuŋguwinan mulup kot mimiyet keŋaŋ temaŋ penaŋ kegogak matazin keyepmti neŋ Kawawaŋgat wisikŋ penaŋ manzeyap. ¹⁷Egaŋ in kot indamukulem mimiyet keŋaŋ temaŋ eweŋanak matazin yaŋ neŋ in kot indamukulem mimiyet nâmti zempema egaŋ zetn gawepumti oloŋen temaŋ mti inmagen kosât tapmin. ¹⁸Neŋ ekmak an notn ŋen kapi mamti Kawawaŋgalen Zet Zapat Dolakŋaŋ Penaŋ zenze mulup mme dapmelange ekŋen kapiyetnaŋaŋ mulup aŋin ke maegoip an kemak ilisakwep idema kolup. ¹⁹An ke dapmelange ekŋenaŋ egomti zempeme nitmak ke koti in tewalaŋ mânep bewep ke timti Zudia am met indandayet zempewien. Mulup kegok mmann Zudia am ekŋenaŋ nin indamukulem mimiyet keŋin temaŋ tazin ke ekti Amobotnaŋgat kwizet buŋamaŋ temaŋ mmobep.

²⁰Nin in am bekopsat indamukulem mimiyet tewalaŋ mânep temaŋ ke beme damuŋ mti mmetnepemann tuŋgupan notnaŋ yuŋgume zet mmot mtot notnaŋ tuŋgupan sokbewemagat weyaŋ eksewanup. ²¹Amobotnaŋaŋ ikŋaŋ nin an dolakŋaŋ elak mandikmâtâtndein keyepmti nin kwitnaŋ kwitnaŋ kapiaset mulupm weyaŋti mmann am ekŋenaŋ kegogak ndikmâtâtâtgat nâmti maminup.

²²Egetmak an notn ŋen ewe pema kozin ek ke pienen mukulem mulup notnaŋ mimiyet zempemann egaŋ ŋep etaŋ mamme eknup keyepmti

^a 8:15 Meu kwitnaŋ mana zenup kapi msat tuŋgupan Kawawaŋgalen amnaŋ meuyet gakiwaletme meu kapiyaŋ msat tuŋgupan indapelenguye.

nin ingat ekñenañ Zudia am nâmkijpepemak ekñen indamukulem mimindendeyet keñin temañ matazin keyet zapatnañ zema nâmti egañ inmak kot mânep akuku mulup ñep penañ mbep elak penañ nâmkatikbempti pemann kozin. ²³ An ñenañ Taitasiyet yañañ nâsâgât indayañkwesime in nâgât ekmak ilisakwep nin ndamukulem mimiyet mulup mamilup kekok dundume nâmbep. Ma an zut ñen keyet yañdangat idayañkwesime in pigok zewep, “An zut kapi Kilaisiyelen kwizet buñamañ mpalakñañ bembeyet nâmti dapmelañgeñine ekñenañ mulup kapi mimiyet zemideme kobun.” Kegok zeme nâmbep. ²⁴ Neñ ingat am dolakñañ zemti dapmelañge ekñengat tunguwinan sekñin mmotindewan keyet katañ in an ekñen keyañ kopme gogot mimindawep. Âpme nin meti dapmelañge notnañ ekñenmagen met zet zemti ingat sekñin mam moindenup keyet penañañ sosok sokbeme ekmâtâbep.

**Pâlañ nâmkijpepemak am indamukulem
mimiyet mânep akum bembeyet zeye**

9 ¹⁻² In Kawawañgalen am Zudia msalen maip ekñen indamukulem mimiyet keñin temañ e eweñanak matapme egañ. Keyepmti neñ Masedonia dapmelañge ekñengat zikalinan ingat sekñin mmot indemti masesewatindemteman. Âpme am nâmkijpepemak notnne bekakan Gilis msalen maip ekñenañ nup kan tipman baenak yañbempti mânep akum bembeyet mulupmañ mkwabien. Nâip, in Zudia am indamukulem mimiyet keñin temañ tapme mamip keyañ am sambe notnañ keñin mamwatindein. ³ Neñ ingat sekñin mmot indemti zet zewan keyet penañañ ku sokbenakmagat in keyet penañañ mânep akuku mulup tapmme an nâmkijpepemak notnne notnañ zemindema kolip ekñen keyañ inmagen kot patañ zemti indamukulem mme in mânep zenzeñañ ke akum beme delañ zeme tapmambep. ⁴ Mneti wan inlak akumti beyo mene zemti neñ Masedonia am notnañ indati nsakwep kotneti indikmann in mânep ñen ku akumti bembenañ tapme ekti inmak nin nsakwep Masedonia am ekñengat zikalinan sakambuk mbanupmagat in mânep akuku mulup eweñanak mbempti tapmambep. ⁵ Neñ mulup keyet nâma temañ penañ beme keyepmti an ekñen ke eweñanak ñeñañ zemindema kolip. Kot indamukulem mme in tewalañ mânep akumti beme mebegat zetik mbien ewan ke tapmme neñ bam koti indikbap. Ke am ilinañgat keñ taolelinañgat penañañ nâmti beip sepem kekok bewe. Wa ningat ekñenañ zeme tapmnup sepem kekok ku bewe.

⁶ Pigok penañ zemâtâpma nâit: An ñenañ mulupmañ temañ mti alik alik sambe kwitnañ katañ maondein. Ek nimwiañ wiañañ omba penañ mamin ma an ñenañ mulupmañ belaknik mti alik alikñañ belaknik maondein beme nimwiañ wiañañ belaknik bugan masokbemsain. ⁷ An kwep kwep in ilinañgat nânâñjin tazin keyet katañ nâmti keñ taolet

palen tewalaŋ mânep bewep. Wa ningat ekŋenaŋ zeip keyet ma amnaŋ tabeipgat bene zemti ku bewep. Kawawaŋaŋ am keŋ taolet tewalaŋ mambeip ekŋen keyet nâme dolakŋaŋ mambein. ⁸Âpme Kawawaŋaŋ am ekŋen ke naman kwileki ŋeniyet maolalip beme e egaŋ ŋep omba indamkwatawe. Âpme ekŋenaŋ olat olatpiŋ tim nimwiaŋti mamaip. Mti mulup dolak dolakŋaŋ notnaŋ zigoset tapmezin ke mukulem mti mamelip. ⁹Sepem kegogapmti Kawawaŋgalen Zet Itnaŋaŋ keyet keŋaŋ zet ŋen pigok tazin,

“An ŋenaŋ am bekopsat sambe kwitnaŋ kwitnaŋ sambe
maindamkwatain keŋ taoletnaŋ keboŋ ke am ŋenaŋ ku kanda
pewe.” (Sam 112:9)

¹⁰Am sambe nin bepi Kawawaŋaŋ etaŋ meu alik maakumndain. Âpme nin msalen pemann egaŋ ikŋaŋ meu agulam mme penanaŋ sambe sosop sokbemndame matimti nimwiaŋnup. Egaŋ in alik alik sambe ke akumti indame in mme sambe penaŋ masokbemindain. Ke tim nimti notnaŋ timti Kawawaŋgalen am notnaŋ indamukulem mbep. ¹¹Kawawaŋaŋ in kwitnaŋ kwitnaŋ sambe indamkwatame olat olatpiŋ mamti in naman am bekopsat notnaŋ ekŋengat tewalaŋ akum beme nin timti met indawanup. Âpme ekŋenaŋ ingat keŋin dolakŋaŋ beme Kawawaŋgat wisikŋ zemti kwizet buŋamaŋ mwabep. ¹²In mulup kekok mti Kawawaŋgalen am sambe Zudia msalen maip ekŋen ke indamukulem mimindeme mama mimiŋin dolakŋaŋ keyaŋ am sambe keŋin mwapme sambe penanaŋ koti Kawawaŋgat wisikŋ zewep. ¹³In am nâmkŋipepemak bekopsat Zudia maip ma am keboŋak msat notnanen indamukulem mmepme ekŋenaŋ in tewalaŋ mimindamebep. Keyet oloŋen temaŋ mimindewep mti in Kilaisiyelen zet zapat dolakŋaŋaŋ manzein keyet kataŋ tati muluwin ke mme ekŋenaŋ keyet eyo nâmti Kawawaŋgat kwizet buŋamaŋ mwabep. ¹⁴In sepem kekok mme am ekŋenaŋ ingat tikŋaŋin omba penaŋ tapme Kawawaŋaŋ in indamukulem mimindendeyet dundum sawep. Set dolakŋaŋ kapi Kawawaŋaŋ ikŋaŋ keŋ taoletnaŋ omba penaŋ tasaingapmti weyaŋ zikat indayeen ke mamip. ¹⁵Kawawaŋaŋ ikŋaŋ msalen am nin ikŋaŋgat Nemuŋaŋ Kilais gogot penaŋ mampein mee piwan ningat tewalaŋ temaŋ ndame egaŋ toti ndamukulem mge keyepmti egat wisikŋ zempene.

Pâl Kawawaŋaŋ mulup zet sasaŋaŋ keyet yaŋaŋ zemâtâzin

10 ¹Alak neŋ nananaŋgat mmanaŋgat zapatnaŋ pigok diindoma nâit: In nâgât pigok manzeip, “Egaŋ ninmak kapi matazin beme egaŋ mtopmamti zet sewakŋaŋ mandinndoin. Ya naman met beŋan main kan keyet egaŋ naman nin papia tipkwasisi zet notnaŋ makumndain.” Yaŋgut neŋ Kilaisiyaŋ ikŋaŋ mtot mamti zet sewakŋaŋ mandiindomtan set sepem kegogak mimiyet keŋŋ temaŋ matazin. ²Sepem kegogapmti

neŋ inmagen kobap kan keyet in keŋŋ ku walabep. Mneti peme neŋ in sambe keyet zet tipkwasisi zet zema keyaŋ ɲep ku bewe. Âpme am ningat ekɲenaŋ msat kapiyelen mama mimi mgasik mâti maip manzeip ekɲen kemagengut zet ɲenzinziŋ mimindawap. ³Nin msat palen am bekanaj ekɲen kapiyet tuŋguwinan e penaŋ mamanup. Yaŋgut nin wa msat kapiyelen timbi sâk ke timti an ku maânup. ⁴Nin timbi sâk timti an maânup ke wan am bekanaj msat palen mamti maâip ekɲen keyelen timbi sâk sepem keboŋ yek. Nin Kawawaŋmagen timbi sâk windeŋamber penaj ke timti an windeŋamber penaj Sadaŋ egalen mka ɲande temaŋ maindelemâkunup. ⁵Nin timbi sâk ke timtati nin am zet dâsuki mmot mtot mti Kawawaŋgalen nânânaŋ ke mtopepeyet mulupmaŋ mamip keyelen windeŋaŋ mtopemti am ekɲen ke ɲoktikɲin mgilik zemann Kilaisiyaŋ ɲoktik mimiyet manâin ke etaŋ mti mamayet mamnup. ⁶In zetn kapi gawepumti mulup mme nin keyet sakɲan ektatiŋgut nin am ningalen zet ku maŋgawepup ekɲen ke zet muluwen indendeyet kalem mbanup.

⁷In mulupm mamiap keyet penaŋaŋ ekti yaŋŋ nâmâtâtne mbep. An ɲenaŋ nâgâegaŋ Kilaisiyelen mulup an penaŋ mamain kekok nâmnembe beme an keyaŋ neŋ Kilaisiyelen mulup an penaŋ mayap elak penaŋ nâmâtâtne mbep. ⁸In neŋ nikme neŋ Amobotnaŋaŋ mulupgat winde naŋge keyet sekɲ omba penaŋ mammolapnok penaŋ bein beme ke wa in mtot indendeyet ku mamiap. In indamukulem mimiyet kekok mamiap keyepmti neŋ keyet nâma sakambukɲaŋmak ku bein. ⁹Keyepmti neŋ ingat papia sambe kumti indawan ke wa in sekɲin mma kiŋgagagat nâmti ku kuwan. ¹⁰Am notnaŋaŋ nâgât pigok manzeip, “Pâlaŋ beŋan met mamti papijanen zetnaŋ nukɲaŋ ma tipkwasisi zet makum ndain ya naman pien ninmak kot mame ekmann an sâlâgâgâtnaŋ bugan zetnaŋ mee zeme nâmann windeŋepiŋ mambein.” ¹¹Am nâgât zet kekok manzeip ekɲen keyaŋ pigok nâmbep, neŋ beŋan met mamti papia makum indayap ma sokɲan inmak mamti zet mandiindoyap kemak sepemti igak igak ɲen ku belup.

¹²Wa nin am belak am nânâŋinpiŋ ilinaŋgat mamaŋin bem ekti neŋ an keboŋ geŋ an keboŋ mti mamaip ekɲen keboŋ yek. Am ekɲen keyaŋ ilinaŋgat ziiŋin notnaŋ ilinak bempemti ke ekti keyet kataŋ neŋ keboŋ ek keboŋ mamip. ¹³Yaŋgut nin wa Kawawaŋaŋ winde ndame mulup mamnup keyet nâmti nnaŋgat sekɲ ku mam motnup. Kawawaŋaŋ ikɲaŋ nin mulup mimiyet gesiŋaŋ bemndaye ke inmagen mulup eyo mimiyet nâmti bempaye. ¹⁴Keyepmti nin Kilaisiyelen Zet Zapat Dolakɲaŋ Penaŋ inmagen kot ɲeŋaŋ yaŋbemti zewenn. Wa nin mulupmnaŋgat gesiŋaŋ bemndendeŋaŋ ke sebempemti belak mulup kilom ku mammetnup. ¹⁵Wa nin mulup an maŋge ɲenaŋ inmagen mulup mimiŋaŋaŋ nin keyak sakwalam mti kwizet buŋam temaŋ titiyet nâmti ku mbenn. Nin

Kawawaŋaŋ mulupm mimiyet gesiŋaŋ inimagen bemndeye keyepmti nin mulup mmann in Kilaismagen nâmkijpepeŋin kaliŋaŋ bewe ma mulupmnaŋ inimagen palakŋaŋ bemti omba mekobe e nâmkatik bemti mulup ke inimagen yaŋbemti mbenn. ¹⁶Inmagen mulupmnaŋgat penaŋaŋ kegok sokbeme ektingut nin naman mulup msat beŋan notnanen am ŋenaŋ mulup ku mimiŋan nnaŋgat met yaŋbemti keyet nâmti sekŋ ŋep mmobanup.

¹⁷Kawawaŋgalen Zet Itnaŋaŋ keyet keŋan zet ŋen pigok tazin,

“An ŋenaŋ iŋŋaŋgat sekŋaŋ mmosât nâambe beme egaŋ

Amobotnaŋaŋ mulup ekmagen mge keyet nâmti sekŋaŋ ŋep mmobe.”

(Zelemia 9:24)

¹⁸An ŋenaŋ mulup iŋŋaŋ mbe keyet nâmti iŋŋaŋgat zemesewabe beme Amobotnaŋmagen ŋep ku bewe. Âk Amobotnaŋgat zemesewatpewe beme Amobotnaŋaŋ an keyet nâme dolakŋaŋ penaŋ bewe.

Pâlmak ombemindendeŋaŋ dâsuki ekŋengalen zet

11 ¹In buzak tati nâme neŋ zetn ewe tusumti pigok zema nâit: neŋ nânâ kwitnaŋ kwitnaŋ keŋŋnanen tapme manzeyap ke in ekme am seoŋ ekŋenaŋ manzeip sepem kegoknok mambein. ²Kawawaŋ egaŋ ingat eyak penaŋ mamimindain. Neŋ ingat sepem kegogak penaŋ mamimindeyap. In imbi nembip dolakŋaŋ penaŋ neŋ in awin Kilais ek kwewetaŋ ke wawagat ombemindewan. ³Mneti an ŋenaŋ nânâ sepemaŋ igak ŋen zikat indame ŋoktikŋin yuŋgume Kilais bamkumpewepmagen zemti sekŋ omba penaŋ manzin. In nâip Sadaŋaŋ zet dâsuki zemti Ewa ŋoktikŋaŋ myuŋgume egaŋ walege in sepem kegok mbepmagat eksewep. ⁴In am notnaŋaŋ inimagen koti Zisasiyet yaŋaŋ nin mandiindonup e tapme nan sepemaŋ igak ŋen mandiindoip ma Emetak Teŋ e tapme naman emetak sepemaŋ igak ŋen main ma Kawawaŋgalen Zet Zapat Dolakŋaŋ Penaŋ nin diindondoŋaŋ e tapme nan sepemaŋ igagen diindome in ekŋengalen zelin ke sakwep nâmti keyet nâme penaŋ beme maŋgawepup keboŋgapmti neŋ igat yayaŋ penaŋ miyap.

⁵Neŋ nâma in am ombemindendeŋaŋŋine dolakŋaŋ penaŋ mandiindoip ekŋen keyaŋ neŋ sebem nemti gwaen ku talip bein. ⁶Neŋ Kawawaŋgalen Zet Zapat Dolakŋaŋ Penaŋ zenzennaŋ dolakŋaŋ penaŋ ku masokbemkawaŋ beme egip mene yaŋgut neŋ zet keyet yaŋaŋ ŋep nâmâtâpma delaŋ zein. Keyet yaŋaŋ notnne notnaŋmak nin set sambe mamimkwatnup keyaŋ nânân temaŋ ke msokbeme manndikmâtâkwalip ke.

⁷Neŋ in mwat indendeyet nâmti nanaŋgat nâma tototnaŋ beme kandaŋinan mamti Kawawaŋgalen Zet Zapat Dolakŋaŋ Penaŋ zenze mulup mkwabab. Kan keyet neŋ in mulupm keyet tosaŋaŋ nanayet ku indayaŋkwesiwan. Wa neŋ set ke ku myuŋguwan. ⁸Neŋ ingat

tunġuwinan mamti ingat mulup mma dapmelaŋġe notnaġ ekġenaġ etaġ m̄anewan nabandim mneme mamti mulup mban. Ekġenmagen m̄anep milawat belak kaim timti inmagen pien mulup mban. ⁹Neġ ingat tunġuwinan ke mamti kan notnaġġat m̄anepġat olati keyaŋġut ingat ŋen ku indayaŋkwesimti n̄amban. Ekġen Masedonia dapmelaŋġe notnne bekakan ekġenaġ kwitnaġ kwitnaġġat maolateman ke timti kot manamtemien. Neġ eweŋan mulup inmagen yaŋbemti mkwabab kan keyet ingat palen nukġaŋ ŋen ku pema moge yaŋ ewe mulup mmobap keyet nukġaŋ ŋen ewe ku indawap. ¹⁰Kilaisiyaġ zet penaġ penaġġak manzeman. Neġ sepem kegogak zemti Kawawaŋġalen Zet Zapat Dolakġaŋ Penaġ zenze mulup inmagen tosaŋġepiŋ mamiyaġ keyepmti sekġ ġep mmobap. Âpme Akaia mkaengatnaġ an ŋenaġ ku bekek nembe. ¹¹Neġ yaŋaŋ eneyet zet ke zeyap ke n̄ait. Wa neġ zet kapi ingat wisat mimindemti ku zeyap. Neġ ingat gogotn temaġ penaġ tazin ke Kawawaŋġat zikatnan zeyap.

¹²Neġ mulupm sakam kegogak ewe mmoti ombemindendeŋaġ belakġaŋ notnaġ tosayet etaġ n̄amti muluwin mmambe nin P̄al mee ekġenaġ mulup mamip sakam kegogak maminup zegwem kegok zemti belak sek mmobot zet etaġ mamip ekġen keyelen selin bekekme olabep. ¹³Am ekġen ke wan Kilaisiyelen ombemindendeŋaġ penaġ yek. Ekġen ke belakġaŋ penaġ. Ekġenaġ muluwin d̄asuki kegok mti nin Kilaisiyelen ombemindendeŋaġġane penaġ manup zemti am d̄asuki matetimindeip. ¹⁴⁻¹⁵Sepem kegok tapmimyunġume neġ keyet keŋġ ku mawazin. Sadaŋaġ ikġaŋ eyo sepemaŋ asekti Kawawaŋġalen ensel saŋġa soŋġaŋaġmak keboŋ mambein. Keyepmti Sadaŋġalen mulup anene ekġenaġ asekti naman Kawawaŋġalen mulup an penaġ nin nembonaġ mambeip beme neġ keyet n̄ama kwileki ŋen mamanamaŋ ku mambein. Maneti bam kan temanen an ekġen ke muluwin bekanāŋ mamip keyet tosaŋaŋ esemteŋ bekanāŋġak tim̄abep.

P̄alaŋ ombemindendeŋaġ mulup mti nukġaŋ omba tiye

¹⁶Neġ zet ewe ikġaŋ keyegak sakwalamti zema n̄ait, an ŋenaġ n̄aġat an seoŋ kegok ku dinowe. In n̄aġat n̄amneme am seoŋ ekġen kemak tusumti mamain kegok man̄amnep. Neġ ekġenmak mambak ze neġ mulup ekġenaġ mamip sepem kegogak mti keyet n̄amti sekġ belaknik ġep mmobak. ¹⁷E penaġ. Neġ zet tazeyap kaboŋ kapi Amobotnaŋaŋ n̄ame dolakġaŋ ku bein. Sek mmobot zet kapi e penaġ am n̄an̄aŋinpiŋ ekġenaġ zelin kok zemti mamaip. ¹⁸Am sambe penaŋaŋ kwitnaġ kwitnaġ mammelip keyet n̄amti sekġin mamimmopme indigap. Neġ ekġenmak mabagen sepem kegogak ġep mbak. ¹⁹Kolin dapmelaŋġe in ilinaŋġat n̄ame n̄an̄aŋin temaŋ mambein keyet mti in am myunġunġunġun temaŋ keboŋ ke n̄amindeme mamti inmak zapat mamip. ²⁰In am ekġen keboŋ

ke nâmindeme kot indadamuŋ mti tetimindemti kwitnaŋ kwitnaŋin maomenzerŋtip. Mti ingat nâme tototnaŋ beme belak bepalaksat maindoip. ²¹Neŋ in sepem kekok mimindandayet winderŋaŋ ku mamiyap kekok mimindandayet nâma sakambuk mambein. Am ŋenaŋ mulup kwileki ŋen mti keyet sekŋaŋ mam mozin. Neŋ sepem kekokak ŋep mbak neŋ zet ke setnaŋiŋ e nâmtiŋgut belak kileŋ ke okpema kwazin.

²²Am ekŋen keyaŋ ilinaŋgat sekŋin mmoti pigok manzeip, “Nin Ibu lu am wa pimak, ma nin Israe l am wa pimak Kawawaŋaŋ ikŋaŋ ikŋaŋgat zapat ndaombemndeye.” Ma naman pigok manzeip, “Nin Abalaamgat iŋsokŋane wa pimak.” Ekŋenaŋ zet sambe manzemelip beke neŋ kekokak tatnain. ²³Ekŋenaŋ nin Kilaisiyelen mulup mnup zemti mamimyunŋuip keyepmti neŋ zet kapi ŋenzinŋiŋ palenok kilom ke zeyap. Ekŋenaŋ nin Kilaisiyelen mulup an manup e ŋep manzeip yaŋgut neŋ Kilaisiyelen mulup an penaŋ mamti ekŋen bugan sebemindemti

Kilaisiyelen mulup pi belak omba penaŋ pusinaŋ seksak mammelap. Âpme keyet mti am notnaŋaŋ ŋeŋin zime nati mka katikŋan kan sambe met maneip

ma am notnaŋaŋ sindiwaŋ nawitikme sekŋ pi buyuk beyak mapein. Kekok mme neŋ kan sambe penaŋ gakikiyelen bududuk penaŋ mamiyap.

²⁴Sek 5 bepi Zuda am ekŋenaŋ sindiwaŋ nawitikme kwep nonoŋaŋgat sindip makuma 39, 39, 39 kapi manawitikwatemien.

²⁵Sindiwan miset tuk kapi sek sambe nawitikne nawitikne peme sipsip timti wemban.

Kan ŋeniyet nanzaŋaŋ nom kune kune peme wemban.

Sek tuk pi waŋgaen moti nembu sutnan daen mepma waŋgayaŋ bekanŋaŋ bemti towepme nembuyen waleletgalen bududuk mban. Mise ŋen tambumbu kwep msasa kwep pi waŋga bekanŋaŋ bemti towepme tep pemaŋ ambeti tu palen etaŋ ke manepema toge.

²⁶Kan sambe penaŋ neŋ Kilaisiyelen mulupgat set teepmaŋ penaŋ tokwati mamamteman.

Kan notnaŋgat map tuŋgwawam kwati napmesât mamtan.

Kan notnaŋgat an kambu titi ekŋenaŋ milawatn kambu tisât tati nopeme kileŋ mawemteman.

Nanaŋgat maŋgenne penaŋ Israe l ekŋenaŋ ilin ma am belakŋaŋ notnaŋ ekŋenaŋ nomkume gakisât penaŋ mamkwateman.

Mka ŋande temaŋ notnanen mepma nome gakikiyet nâmti am sambeyaŋ manabembuluŋtemien.

Msat tuŋgupman maneti tu meuyet mti gakisâgât bududuk mamteman.

Waŋgaen moti manepema nembu mamaŋ temaŋ kumti manawaletan.

Am notnaŋ ekŋenaŋ, “Nin Kilais nâmkŋpenup keyet mti nin gâgât nodi,” zemti natetim nemti nati met kasa ekŋengalen belen mambemnemtemien.

²⁷Tambu misa sek sindem sambe tipeŋ mamamteman ma tambu misa pi Kilaisiyelen mulupgat yayaŋ temaŋ mti muluk mee dolakŋaŋ ku maweyaŋ wemteman ma kan sambe pi mka ma saŋgum kâlâpiŋgapmti tâgâyet diŋdiŋ mamteman.

²⁸Wa zema nâip ke etaŋ yek. Kan sambe penaŋ dapmelaŋge sambe ŋep talip ma yek zemti keŋŋ yayaŋ temaŋ mambein.

²⁹Am nâmkŋpepemak ŋenaŋ nukŋaŋ ŋen aikme neŋ kegogak nukŋaŋ matiyap. Ya naman ŋenaŋ yom mme neŋ an keyet mti nukŋaŋ temaŋ matiyap.

³⁰Neŋ sekŋ mmobogat nâmbak beme neŋ Kawawaŋaŋ nukŋanen napmukulem mme mamayap keyet nâmti ŋep sekŋ mmobak. ³¹Neŋ Amobotnaŋ Zisasiyet Bipmaŋ Kawawaŋ an kwizet buŋamaŋ mene mene mamimwalip egat zikatnan neŋ zet ekŋen ke penaŋ zeyap. ³²Neŋ Damaskas mkaen meti mamban kan keyet amobotnaŋ Alatas egaŋ amobotnaŋaŋ ŋen peme Damaskas mkaen mamamtan keyaŋ kasa kuku an notnaŋ indeme ekŋenaŋ met mka set bimaŋ sambe bee nâgât egaŋ mesât kopme ekti atamti met mka katikŋan pesenup zemti dombemti tapmebien. ³³Âpme am notnne notnaŋ ekŋenaŋ zapat ke nâmti buzakset nati met kimbata solonan tati suasembe keŋan naweti mka kimbata enzuŋaset tek tim tapme ululuŋ piyaŋ zupman baen toti keeselak buzak kunzuŋti meban.

Kie kienok Kawawaŋaŋ Pâl kwileki ŋen zikat same ege

12 ¹Neŋ nanaŋgat sekŋ mmoti keyet nâma ŋep penaŋ ku mambein. Neŋ kekok mimiyet nâma ŋep benak beme neŋ Amobotnaŋaŋ kie kienok kwitnaŋ kwitnaŋ enzililiŋan tazin ke zikat name ekbak keyet nâmti sekŋ ŋep mmobak. ²⁻³Neŋ nup kan 14 tipman penaŋ kaimgat Kilaisiyaŋ nati kululuŋ mundum dolakŋan penaŋ keyet keŋan natetim mopme ekban e nâyaŋ yaŋgut ke pe sekŋ melesiŋ napmopme ekban ma belak kie kienok etaŋ zikat name ekban ke weyaŋ ku nâmtâlap Kawawaŋaŋ ikŋaŋgut nâin. ⁴Âpme neŋ ke totati neŋ zet mamanan penaŋ nâmban. Msalen pien am zet ŋande igak igak manzemetnup sepem keboŋ yek igagen keyepmti neŋ ŋep ku zenzeyet ma msalen am zet ke zenâ zenâ mimiyet zemkuluŋ neneŋaŋ. ⁵Ma neŋ kwitnaŋ kwitnaŋ dolakŋaŋ penaŋ kululuŋ gwaen ekmâban keyet nâmti sek mmobot zet ŋep zewak. Yaŋgut neŋ keyet nâmti sekŋ ku mamimolap. Neŋ nukŋanen met tapma Kawawaŋaŋ manapmukulem mnein keyet nâmtiŋgut sekŋ mamimolap. ⁶Neŋ zet penaŋ zeyapgapmti neŋ nanaŋgat kwitnaŋ mmolap

beme neŋ am seoŋ yek. Neŋ an ŋenaŋ nâmneme mobotnaŋ ku bewap. Egaŋ nâlen mama mimi ekti neŋ zet zeyap kapi nâwe. Kok keyet nâme ŋep teŋ beweyeyepmti neŋ nanaŋgat kwitn ku mmobap yek.

⁷Neŋ ekma Kawawaŋaŋ kwitnaŋ kwitnaŋ dolakŋaŋ zikat naŋge. Keyet neŋ nanaŋgat sekŋ ku mmolap Kawawaŋaŋ Sadaŋ nâmpeme zawat nukŋaŋ sekŋnanen bem neŋge. ⁸Miset tuk kapi Amobotnaŋaŋ ikŋaŋ nukŋaŋ sambe bekapi menzempeme mebegat dunduwan. ⁹Yaŋgut egaŋ neŋ dundundu nnaŋgat dopmaŋ pigok gilik zemti naŋge, “Geŋ kwitnaŋ kwitnaŋ maolat temanen elak keŋ taolet nnaŋgapmti elak maŋgamâpma delaŋ zemâzin. Geŋ sek sukŋaŋ sukŋaŋ palen mamanigen nâgât windennaŋ geŋmagen ewe windenaŋbeŋ matazin.” Kegok dinoyeyepmti neŋ sukŋaŋ palen mama Kilaisiyaŋ manadamuŋ mimnein keyet windenaŋ temaŋ tapme Kilaisiyelen winde keyaŋ nabembuluŋti nadamuŋ mme mamayap keyet oloŋen mti sekŋ omba ŋep mmobap. ¹⁰Neŋ Kilaisiyet tikŋaŋ omba penaŋ tazin keyepmti egat kwizet buŋamaŋ mpalakŋaŋ bema keyepmti amnaŋ sisipeŋpeŋ mnamti mene mene nom kupeŋ mme neŋ nukŋaŋ sambe bee timtati tima dukŋnan mopme sebe sugak sugak palen temama Kilaisiyaŋ ikŋaŋ gwatnaŋ mneme egalen windeen katikŋaŋ bemti matalap.

Pâlaŋ Kolin am nâmkŋpepemak ekŋengat yayaŋ temaŋ mimindeye

¹¹In papia kumti nâgât sekŋ ku mmobien. In kekok mme neŋ nanaŋgat yaŋŋ kuwan keyepmti ingat tuŋguwinanŋatnan am notnaŋ ekŋenaŋ nâgât nâme an seoŋ ŋenok mban kekok mambein. Neŋ an tototnaŋ mambak ze in ombemindendenaŋŋine dolakŋaŋ manzeip ekŋengat kandaŋinan baen penaŋ ku mambak. ¹²Neŋ eweŋan inmak kot mamban kan keyet neŋ Kilaisiyelen ombemindendenaŋ mamayap elak eweŋanak ke zemkawaŋ bemti indama nâmbien. Âpme ingat tuŋguwinan sewak sewak palen mamti menok sepem igak igak mti Kawawaŋgalen mulup sepemaŋ igak igak bepi mmepma in ekti maâtâtaliŋ. ¹³Neŋ dapmelaŋge notnaŋ ekŋen dolakŋaŋ maindadamuŋ mmelap. Sepem kekokak in indadamuŋ dolakŋaŋ mimkwaban. Mti mulup sambe notnaŋ bee mkwaban yaŋgut kwitnaŋ kwitnaŋgat olat olat mti in ke napmukulem mimiyet kwep kegut ku indayaŋkweŋiwan. In keyet nâme neŋ ke myuŋguwan beme in yomm ke katikpewep.

¹⁴Neŋ inmagen sek zut pilak koban. Yaŋ pi ewe naman kot indiksât tapmiyap in nâgât yayaŋ mti mânewin kileŋ ku time mebe. Neŋ inmagen mulup met mimiyet tikŋaŋ omba penaŋ matazin keyepmti kobap wa in mânep nanayet nâmti yek. Nemba isikŋaŋ ŋenaŋ mamaŋ bipmaŋ ku maidadamuŋ min. Nemba mamaŋ bipmaŋyaŋgut nemba maindadamuŋ mip. ¹⁵Neŋ ingat gogotn omba penaŋ matazin keyepmti neŋ mânepm mee tima mepme in indamukulem mimiyet nâma oloŋenaŋmak beme

mulup mamiyap. Keboŋ mma in naman nâgât gogolin belaknik bugan matazin mene?

¹⁶In nâgât yaŋŋ ŋep nâmâtâlîp neŋ in nukŋaŋ ŋen ku indawan. Keyaŋgut am notnaŋ ekŋenaŋ nâgât pigok manzeip, “Setnaŋ mee e ikŋaŋ ŋep kwitimti kobe. Yaŋgut pien kot mamti nin tetimndemti ŋoktikŋ mme yuŋgume mânepm mee tiwe.” ¹⁷In nâgât nâme neŋ an notnaŋ zemindema koti ingat zeme in mânep indame ekŋenaŋ mti kot name makwitim niap kekok mambein. ¹⁸Neŋ Taitas inmagen kokogat yaŋkwesim nâma egaŋ ŋep zeme nâmti ekmak notnne notnaŋ zemindema kobien. In nâme neŋ an ekŋen ke zemindema koti in zet kelakŋaŋ mimindamti mânewin mee zemtimiti kot nanayet zemindewan kekok bein ma? Ekŋenmak neŋ nsakwep mulup yaŋaŋ kwep mimiyet mamnup ma mama mimi dolakŋaŋ sambe bee mmâbenn.

¹⁹Nin zet sambe mandiindom kwatnup bee in nâme nin ingat zikalinan kwetetepmaŋ mamayet nâmti etaŋ manzenup kekok mambein ma? E yek penaŋ. Nin Kilaisiyaŋ zet sepem kekok zemti Kawawaŋgat zikatnan mamayet nâmndeye keyepmti notnne dolakŋaŋ in pigok nâmbep. Nin kwitnaŋ kwitnaŋ sambe mam mann egip bee in indamukulem mimiyet etaŋ nâmti mamnup. ²⁰Mneti neŋ ingat sepemin nâmban e ŋen tapme in mama mimi bekanaj sambe mti mdândândâ palen ma kwitnaŋ kwitnaŋ bekanaj mimiyet ayak ma ŋenzinziŋ palen ma kwitnaŋ kwitnaŋ ilinaŋgat etaŋ time kwaopme nimwiaŋti mama ma lowek zet ma zeok zet ma sek mmoti mama kekok mti dapmelanŋeyelen set pi kumasekme delaŋ zeme mame neŋ kot indikti endilipemti naman in nâgât nâmbien e tapme neŋ asekti sepem ŋen tapma nikbepmagengat eweŋanak eksemti mambe. ²¹Ingat tuŋguwinaŋgatnaŋ am notnaŋ ekŋenaŋ mama mimi okbi okbiŋaŋmak sambe penaŋ pigok mbien. An imbi set kileŋ mama ma mama mimi bekanaj mimiyet sebelaj dindiŋ mimi ma nolinaŋgat imbiŋaŋ menzem wawat set sepem kekok mti ekŋenaŋ keŋin gilik zemti kwitnaŋ kwitnaŋ bekanaj sambe ke bamkumpepepiŋ mbien. Yom temaŋ kekok ke mkwabien keyepmti maneti neŋ kan ŋeniyet indiksât kotneti indikma in ewe yomenagak tapme indikti Kawawaŋgat ŋeŋzimosetnaŋ sakambuk temaŋ mti ingat tuŋguwinan si temaŋ suma ŋep ku bewemagen zemti kiŋgalap.

Pâlaŋ eksese zet notnaŋ zeye

13 ¹Pi neŋ inmagen kopma sek tuk ilak besâpm. Âpme Kawawaŋgalen Zet Itnaŋaŋ keyet keŋan zet ŋen pigok tazin, “An zut ma tuk ekŋenaŋ an ŋeniyet myuŋguŋguŋaŋ ŋen ekti zewep beme an ke ŋep wati zet muluwen met pewep.” (Zii Zet 19:15)

²Neŋ inmak mamban kan keyet am yommak mambien in yomin zemkawaŋ bemti mamayet ma am notnaŋ in mamaŋin weyaŋ ektitim

mamayet eksese zet diindowan. Ya alak pi naman zapat meluwaŋ kapiyet keŋan in sambeyet temakwep eksese zet ewe kumti indayap. Kan neŋ kobap keyet am yomin mbien ke ewe zemkawaŋ bembepiŋ mambep beme ekŋen ke zet muluwen katikŋaŋ penaŋ onzemindema tabep. Neŋ ekŋengat kemberŋ ku mbap. ³In nâgât pe Kilaisiyelen ombemindenderaŋ penaŋ main ma yek manâmnep keyepmti neŋ inmagen koti am yominmak ke zet muluwen indesât zewan ke indema in Kilaisiyaŋ neŋmak tapme mulup mamiap keyet yaŋaŋ ŋep nikmâtâtnembep. Wa Kilaisiyaŋ ingat mulup poptep poptep bugan ku mamin egaŋ inmagen mulup windeŋamberak mamin. ⁴Egaŋ eweŋan msalen pien manepeme atamti tewen kumasasokpewien. Kan keyet penaŋ windeyep timmage yaŋgut Kawawaŋgalen windeyaŋ mme gilik zemti wati main. Âpme am nin met ekmak tusumti manup nin penaŋ windennpiŋ mamanup. Yaŋgut nin ekmak tapmann Kawawaŋgalen windeyaŋ ninmak tapme nin egalen winde kemak tati ingat zelin ŋep zemuwet indewanup.

⁵In am nâmkŋipepeŋinmak ma belak mamaip e in ilinaŋgat otnânâŋinan baen kwalimti egit. In Kilais Zisas ingat keŋinan baen matazin ke in ku manâmmâtâpeip ma? Ku weyaŋ nâip beme Kilaisiyaŋ ingat keŋinan ku matazin elak sosok sokbemkawaŋbewe. ⁶Neŋ in ningat nâmndeme Kilais penaŋ nâmkŋipemti mamanup mambein elak penaŋ nâmkatikbemindeyap. ⁷In ningat ekŋen ombemindenderaŋ penaŋ yek e ŋep manâmndeip yaŋgut in Kilaisiyelen mama mimi dolakŋaŋ ke mâti mambep beme in ningat Kilaisiyelen ombemindenderaŋ penaŋ elak ŋep nâmndewep. Nin in Kawawaŋaŋ indamukulem mme yom ŋen mimipiŋ mamti mama mimi dolakŋaŋ Kawawaŋaŋ nâmtikŋaŋ mamin ke etaŋ mti mamayet nâmti mandundum sanup. ⁸Nin Kawawaŋgalen Zet Zapat Dolakŋaŋ Penaŋ kapi windeŋaŋ kumann togotat mulupmaŋ ŋen ku mbenn. Elak ilin ŋep nâmmâtâtndeip. Nin Kawawaŋgalen Zet Zapat Dolakŋaŋ Penaŋ kapi mukulem mmann msat sambe palakŋaŋ mebegat mulupmaŋ etaŋ mamnup. ⁹In nâgât an tototnaŋ bugan e ŋep mandinoip wa neŋ keyet nâma bekaŋaŋ ku bein. Âpme in ŋepgat windeŋinberŋ ke mambep. Yaŋgut nin in Kawawaŋaŋ indamukulem mme nâmkŋipepeen kaliŋaŋ penaŋ bemti mamayet nâmti Amobotnaŋgat mene mene mandundum sanup. ¹⁰Neŋ Amobotnaŋaŋ in gwatnaŋ mimindendeyet nâmti neŋ winde naŋge wa ke in memendep mimindamti indawalet indendeyet yek keyepmti neŋ beŋan pien mamti in papia kapi eweŋanak kumti indayap. Ke ekti in eweŋanak weyeyaŋ mulup mimiyet nâmti bema kozin. Mneti neŋ koti winde keyaŋ naman mtoindema ŋep ku bewemagen zemti meluwaŋ kapi kumti indayap.

Pâlaŋ notnane mukumindeye

¹¹Notnne, neŋ zetn pigok zemdelan zema nâit: In Kilaismak maip keyepmti tuŋguwinaŋ oloŋen palen mama mimi keyaŋ weme

nâmkijpepen katikŋaŋ bemti mambeŋ. In nâlen zet zeyap kapi gawepume delaŋ zemâbe. In ŋoktikŋin ma nânâŋin kwep bemti sewakŋaŋ palen mambeŋ. Mme Kawawaŋ an gogot toŋaŋ ma an sewakŋaŋ toŋaŋ egaŋ ingat tuŋguwinan mambe.

¹²In Amobotnaŋmak maip keyepmti in ilinak dopmaŋ mukulem dopmaŋ mukulem mti bet butem aiwep. ¹³Am nâmkijpepemak pien manup nin in indamukumindenup.

¹⁴Neŋ Amobotnaŋ Zisas Kilaisiyelen keŋ taolet ma Kawawaŋgalen gogot keyet keŋan tapme Emetak Teŋaŋ pende zamindeme in ilinak notn notn mti oloŋen palenak mamayet nâmti mandundayap.